



جدوال قمبرچاين خطبه جمعة

Siri 10/ 2022

(Bulan Oktober Tahun 2022M)

ب	تاجوق	تاريخ
1.	رسول دچينتاوي، سنة دحياتي	7.10.2022M/ 11 Rabi'ulawwal 1444H
2.	رمقيت: باره سوسيال يڭ كان فاره	14.10.2022M/ 18 Rabi'ulawwal 1444H
3.	كلستارين عالم سكيتر	21.10.2022M/ 25 Rabi'ulawwal 1444H
4.	ليندوغي هرتا: اواسي scammer	28.10.2022M/ 2 Rabi'ulakhir 1444H
	خطبه كدوا	

فرچيتقن ديبايعي:



تليفون: 04-5498088



***Jawatankuasa Panel Semakan Teks Khutbah Negeri
Pulau Pinang***

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ketua Penolong Pengarah Kanan, Sektor Pendidikan Islam,
Jabatan Pendidikan Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Guru, Madrasah Irshad Al-Ashraf Al-Wataniah, SPS
- 7. Ustaz Subki bin Mohamed**
Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)



لیندوغي هرتا: اواسي scammer

(28 OKTOBER 2022M / 5 RABI'UL AWWAL 1444H)

الْحَمْدُ لِلَّهِ وَلِيِّ مَنِ اتَّقَاهُ، مَنِ اعْتَمَدَ عَلَيْهِ كَفَاهُ، وَمَنْ لَادَ بِهِ وَقَاهُ.
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ وَمُصْطَفَاهُ،
صَلَّى اللَّهُ وَسَلَّم عَلَى سَيِّدِنَا مُحَمَّدٍ، وَعَلَى آلِهِ وَأَصْحَابِهِ وَمَنْ دَعَا بِدَعْوَتِهِ
وَاهْتَدَى بِهَدَاهُ.
أَمَّا بَعْدُ، فَيَا عِبَادَ اللَّهِ، خَيْرُ وَصِيَّةٍ يُوصَى بِهَا الْمَرْءُ: تَقْوَى اللَّهِ عَزَّ وَجَلَّ،
اتَّقُوا اللَّهَ حَقَّ تَقْوَاهُ.

SIDANG JUMAAT YANG BERBAHAGIA,

Marilah sama-sama kita bertakwa kepada Allah dengan mentaati segala perintah Allah dan meninggalkan segala larangan-Nya. Mudah-mudahan kita tergolong dalam kalangan mukmin yang berjaya di dunia dan di akhirat.

Sebelum melanjutkan bicara, suka khatib memberi peringatan. Marilah kita tinggalkan perkara lagha yang bertentangan dengan sunnah serta adab yang boleh mengurangkan pahala, iaitu tindakan yang memesongkan perhatian daripada mendengar khutbah dan isi kandungannya. Ini termasuklah perbuatan berbual-bual, tidur dengan sengaja, bermain telefon bimbit dan menggerakkan tabung kutipan semasa khatib sedang berkhutbah. Bagi melengkapkan kewajipan solat jumaat hari ini, marilah kita menghayati bicara mimbar yang bertajuk: **"LINDUNGI HARTA: AWASI SCAMMER."**

SIDANG JEMAAH YANG BERBAHAGIA,

Memelihara harta adalah salah satu daripada maqasid syar'iah. Perbuatan mengambil harta dan merampas hak orang lain adalah batil dan haram serta



berdosa dan kita dilarang melakukannya. Perbuatan tersebut akan mengancam keharmonian dan pastinya akan membawa mudarat yang besar dalam kehidupan umat Islam dan seluruh masyarakat. Allah ﷻ menegaskan perkara ini menerusi firman-Nya dalam surah An-Nisa, ayat 29:

يَا أَيُّهَا الَّذِينَ ءَامَنُوا لَا تَأْكُلُوا أَمْوَالَكُمْ بَيْنَكُمْ بِالْبَاطِلِ إِلَّا أَنْ تَكُونَ تِجَارَةً عَن تَرَاضٍ مِّنْكُمْ وَلَا تَقْتُلُوا أَنْفُسَكُمْ إِنَّ اللَّهَ كَانَ بِكُمْ رَحِيمًا ﴿٢٩﴾

Maksudnya: “Wahai orang-orang yang beriman, janganlah kamu makan (gunakan) harta-harta kamu sesama kamu dengan jalan yang salah (tipu, judi dan sebagainya), kecuali dengan jalan perniagaan yang dilakukan secara suka sama suka di antara kamu, dan janganlah kamu membunuh-bunuhan sesama sendiri. Sesungguhnya Allah sentiasa mengasihani kamu.”

Mengambil harta orang lain dengan cara yang batil seperti berjudi, mencuri, merompak, rasuah, menipu, memperdaya dan yang amat serius lagi menjadi-jadi pada masa kini adalah penipuan melalui siber atau *scammer*. Kemajuan teknologi maklumat telah disalah guna untuk melakukan jenayah penipuan dalam talian dan ia semakin berleluasa dan telah memperdaya ramai mangsa.

Penjenayah yang dikenali sebagai *scammer* berniat jahat merampas harta dan wang milik mangsa dengan cara memujuk, menipu, menakut-nakutkan, memperdaya dan memeras ugut mangsa-mangsa tersebut. Paling meresahkan dan menyedihkan apabila kebanyakan penjenayah yang telah ditangkap terdiri daripada kalangan orang Islam sendiri. Sedangkan sikap seorang muslim sepatutnya tidak menzalimi dan menipu orang lain sebagaimana hadis riwayat Imam Al-Bukhari, daripada Abdullah bin ‘Amru, Rasulullah ﷺ bersabda:

الْمُسْلِمُ أَخُو الْمُسْلِمِ لَا يَظْلِمُهُ وَلَا يُسْلِمُهُ وَمَنْ كَانَ فِي حَاجَةِ أَخِيهِ كَانَ اللَّهُ فِي حَاجَتِهِ

Maksudnya: “Seorang muslim adalah saudara bagi muslim yang lain, dia tidak menzaliminya dan tidak membiarkannya untuk disakiti. Siapa yang membantu keperluan saudaranya, maka Allah akan menunaikan hajatnya.”

SIDANG JEMAAH YANG DIRAHMATI ALLAH,

Kita mestilah mengambil peduli mengenai bentuk-bentuk jenayah dalam talian seperti *macau scam*, pinjaman tidak wujud, pelaburan tidak wujud, *love scam* dan jenayah e-dagang. Wujud juga jenayah dalam bentuk penipuan panggilan seperti kononnnnya mereka melakukan penculikan ahli keluarga kita untuk meminta wang tebusan, penipuan cabutan bertuah dan penipuan memenangi peraduan atau percution.

Apa yang membimbangkan ialah, kes-kes jenayah dalam talian ini semakin meningkat saban tahun. Bagi tahun 2022, sehingga Julai lalu, jumlah keseluruhan kes yang dilaporkan ialah sebanyak 13,137 kes. Manakala jumlah tangkapan adalah sebanyak 6,947 kes. Jumlah keseluruhan kerugian yang dicatatkan melebihi Ringgit Malaysia 427 juta adalah sangat menakutkan.

Modus operandi penjenayah ini sentiasa berubah. Mereka sangat licik melakukan penyamaran sebagai ahli keluarga, sahabat handai, orang kenamaan dan sebagainya sehingga menjadikan mangsa percaya dan terpedaya dengan pujukan mereka. Malah, mereka juga menyamar sebagai pihak berkuasa seperti polis, pegawai pencegah rasuah, pegawai kastam, wakil mahkamah, pegawai Lembaga Hasil Dalam Negeri, pegawai bank dan lain-lain untuk mengugut mangsa supaya melakukan tindakan yang diarahkan.

SIDANG JEMAAH YANG DIRAHMATI ALLAH,

Antara punca yang menyebabkan mangsa mudah terpedaya ialah penjenayah ini dapat menyebut identiti mangsa dengan tepat. Mangsa juga langsung tidak diberi ruang masa untuk berkomunikasi dengan orang lain. Selain itu, mangsa juga diugut akan ditangkap, dituduh dan dikenakan tindakan di bawah Akta Pengubahan Wang Haram yang menjadikan mangsa merasa takut sehingga sanggup mengikut arahan yang diberikan penjenayah.

Oleh itu, sekiranya kita menerima panggilan yang sedemikian, janganlah panik dan teragak-agak untuk menamatkan panggilan tersebut. Buatlah catitan

maklumat dan maklumkan perkara tersebut kepada ahli keluarga supaya mereka dapat membantu kita untuk mencari jalan penyelesaian terbaik dan laporkanlah segera kepada pihak berkuasa.

Kita mesti mengambil tahu bahawa apa-apa urusan lebih-lebih lagi yang melibatkan urusan rasmi kerajaan seperti urusan mahkamah, ia sama sekali tidak akan dilakukan secara dalam talian sahaja sebaliknya perlu dijalankan secara bersemuka apatah lagi jika melibatkan urusan seperti pembekuan aset. Rujuklah agensi atau pihak berkaitan sebelum melakukan apa-apa tindakan.

Khatib mengingatkan bahawa jika kita melalui situasi ini, janganlah melulu dan bersendirian, berkongsilah dengan ahli keluarga atau mereka yang boleh memberikan nasihat terbaik untuk kita mengambil tindakan yang bijak.

Situasi ketidaktentuan ekonomi dunia turut menjadi penyebab kesusahan hidup masyarakat. Dalam kesempitan tersebut, penjenayah juga menawarkan pinjaman tidak wujud melalui aplikasi telefon dan khidmat penghantaran mesej seolah-olah dia daripada pihak bank dan institusi kewangan. Mangsa yang terpedaya dikehendaki membayar wang untuk proses pinjaman tersebut yang sebenarnya tidak wujud. Akibatnya, mangsa yang terdesak semakin dihipit kesempitan wang.

Justeru, khatib sekali lagi mengingatkan kepada semua, janganlah sesekali percaya dengan sebarang tawaran pinjaman melalui kaedah ini kerana ia adalah taktik penipuan penjenayah dalam talian.

SIDANG JEMAAH YANG DIRAHMATI ALLAH,

Khatib mengingatkan agar kita jangan sekali-kali terlibat dengan aktiviti jenayah dalam talian ini. Antaranya dengan bersubahat atau dipergunakan, menjadikan akaun bank kita sebagai akaun “keldai” yang digunakan oleh orang lain tanpa disedari ataupun secara sukarela. Kebanyakan mereka yang terlibat adalah golongan terdesak atau mengejar pendapatan lebih dan mempunyai tahap celik kewangan yang rendah seperti suri rumah, penganggur, pelajar dan warga emas. Mereka telah ditawarkan dengan habuan yang lumayan oleh sendikit tersebut.

Berdasarkan statistik, sebanyak 205,544 akaun keldai telah dapat dikesan sejak tahun 2014, lebih daripada 34,000 tangkapan telah dilakukan daripada tahun 2016, sehingga bulan Mac 2022. Kebanyakan yang didakwa adalah pemilik akaun itu sendiri sedangkan sindiket masih lagi bebas berleluasa dengan mencari mangsa lain pula sebagai keldai akaun.

Justeru, sebagai pemegang akaun bank, kita bertanggungjawab sepenuhnya ke atas apa jua transaksi dan maklumat perbankan peribadi kita. Janganlah kita mendedahkan atau berkongsi apa jua maklumat perbankan peribadi dengan orang lain untuk apa-apa tujuan sekalipun, walaupun untuk tujuan permohonan pekerjaan mahupun pinjaman dengan mana-mana pihak. Selidiki terlebih dahulu latar belakang dengan siapa kita berinteraksi.

Bersama-sama, kita menyedarkan ahli keluarga, jiran tetangga, rakan taulan dan sanak saudara supaya menjadi masyarakat yang bijak dan berhati-hati supaya tidak terjebak dengan akaun keldai ini sama sekali. Laporkan kepada pihak bank dan polis jika berlaku kehilangan kad bank atau penyalahgunaan akaun bank. Di samping itu, janganlah bersekongkol dengan pihak yang meminta kita melakukan aktiviti mencurigakan seperti membuat pindahan wang kepada orang yang tidak dikenali.

SIDANG JEMAAH YANG DIRAHMATI ALLAH,

Kesimpulan yang dapat diambil daripada khutbah hari ini ialah:

Pertama: Islam melarang daripada melakukan perbuatan mengambil harta dan merampas hak orang lain dengan cara yang batil. Ia akan membawa kesan buruk yang besar kepada kehidupan umat Islam dan seluruh masyarakat.

Kedua: Sentiasalah waspada dengan sebarang panggilan telefon yang mencurigakan, segeralah melaporkan kepada pihak berkuasa untuk mengelakkan kita menjadi mangsa sindiket penipuan.

Ketiga: Lindungilah data peribadi dan akaun bank supaya kita tidak terjebak.

Marilah bersama kita renungkan firman Allah **سُبْحَانَهُ وَتَعَالَى** dalam surah Al-Maidah ayat 2:

... وَتَعَاوَنُوا عَلَى الْبِرِّ وَالتَّقْوَىٰ وَلَا تَعَاوَنُوا عَلَى الْإِثْمِ وَالْعُدْوَانِ وَاتَّقُوا اللَّهَ إِنَّ اللَّهَ

شَدِيدُ الْعِقَابِ ﴿٢﴾

Maksudnya: “.....dan hendaklah kamu bertolong- tolongan untuk membuat kebajikan dan bertakwa dan janganlah kamu bertolong-tolongan pada melakukan dosa (maksiat) dan pencerobohan dan bertakwalah kepada Allah, kerana sesungguhnya Allah maha berat azab siksa-Nya (bagi yang melanggar perintah-Nya).”

بَارَكَ اللَّهُ لِي وَلَكُمْ فِي الْكِتَابِ وَالسُّنَّةِ، وَنَفَعَنِي وَإِيَّاكُمْ بِالْآيَاتِ وَالْحِكْمَةِ، أَقُولُ
قَوْلِي هَذَا، إِنَّ كَانَ صَوَابًا فَمِنَ اللَّهِ الْمَنَّانِ، وَإِنْ كَانَ خَطَأً فَمِنْ نَفْسِي وَالشَّيْطَانِ،
وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ إِنَّهُ هُوَ الْغَفُورُ الرَّحِيمُ.



خطبة كدوا بولن اوكتوبر

2022M/ 1444H

الْحَمْدُ لِلَّهِ عَلَى آلَائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِسَانِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا : إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا

تَسْلِيمًا ﴿٥٦﴾ [الأحزاب: 56]

اللَّهُمَّ صَلِّ وَسَلَّم عَلَى عَبْدِكَ وَرَسُولِكَ مُحَمَّدٍ نِ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَئِمَّتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.
اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan
Agong, Al-Sultan Abdullah Ri'ayatuddin Al-Mustafa Billah Shah Ibni
Almarhum Sultan Haji Ahmad Shah Al-Musta'in Billah dan Kebawah
Duli Yang Maha Mulia Seri Paduka Baginda Raja Permaisuri Agong,



Tunku Hajah Azizah Aminah Maimunah Iskandariah Binti Almarhum
Al-Mutawakkil Alallah Sultan Iskandar Al-Haj;

وَكَذَلِكَ صَاحِبُ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul
Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزُّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَن بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ
عَامَّةً يَا رَبَّ الْعَالَمِينَ. اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجُدَامِ وَمِنْ سَيِّئِ
الْأَسْقَامِ، يَا أَرْحَمَ الرَّاحِمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf.

Ya Allah! Berilah petunjuk-Mu kepada kami, pemuda-pemuda kami, pemimpin-pemimpin kami untuk memberikan khidmat bakti yang terbaik kepada agama, bangsa dan negara.

Ya Allah! Kau hindarilah kami daripada perbuatan-perbuatan khianat dan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ! ۞ إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٥١﴾ فَادْكُرُوا اللَّهَ الْجَلِيلَ يَذْكُرْكُمْ
وَأَشْكُرُوهُ عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿٥٢﴾